

編號 1 號

【路燈著咧】林伯殷原作

臨暗邊仔，天還唔暗，屋脣个路燈就著咗，係無同佢看較真兜仔，頭下碼¹還正經毋知路燈既經著哩，一直愛等到天大暗，路燈个電火緊來緊光，正確確實實知講自家屋脣个路燈有著咗！在暗晡頭，這支路燈膠吾屋脣个大路箭到²光光，同出出入入个人車都照到清清楚楚。逐日食飽夜，鄰舍會企在路燈下打嘴鼓，共下等垃圾車來；熱天時節，屋肚較熱，路燈下自然又變成大家寮涼、散步个所在；等到寒天，路燈又像係一蕊光明燈，就像係企在該等等同人講：「看著佢，燒暖个屋下就到咧！」

臨天光仔，路燈就起勢定定仔行下戲棚，天越光，路燈火就越看毋著，最尾，連幾時烏忒个也無人知。路燈盡知進退，完全毋會去同日頭搶光³，日時頭，路燈就在該恬恬等，等到夜來个時節就做得好好發揮哩！

斷烏咧，路燈準時來上棚⁴！膠負責个所在照到光光光，久咧，人嘎分路燈縱壞，毋記得佢逐夜就恁認分、恁煞猛，一直愛到有一

¹ 頭下碼：音 teu ˇ ha ma ˊ；剛開始的時候。

² 箭到：音 jien do；直射至。

³ 搶光：音 qiong ˋ gong ˊ；爭著出風頭。

⁴ 上棚：音 song ˊ pang ˇ；上場了。

暗晡，發現著原本愛光个地方還暗暗，正會知路燈原來有恁好！想起吾个老屋，暗晡頭屋脣滿哪仔暗摸叮咚⁵，係無擎火⁶，根本就行無路，毋使想出半步門，毋過，就算有擎火行路，該細粒電珠仔⁷發出弱弱个光，照得路來，驚頭那頂有螞蟻絲；照得頭那頂來，又驚蛇哥隨時會對路脣弄出來⁸，毋管自家仰般細心細意，心肝肚還係會驚驚險險⁹，哪當得¹⁰這下个路燈火，分人恁安心、恁自在！

一支路燈，照光个地方盡有限，毋過，路燈係一支一支仔連起來，該就做得照亮一隻莊頭、一條街路、一座都市，路燈毋單淨照亮一隻地方，也減少咧日膠夜个爭差¹¹，改變咧人个生活，都市肚个公園，暗晡頭還有人在該練氣功、跳舞同運動，大路也還有人行路、騎自行車，係無路燈，敢有可能？

暗咗，路燈又著咧！佢知路燈會同當多暗暗个地方照到光光，分人方便上下、分人做得安心，佢也知有當多人同路燈共樣，恬恬在該照亮 俚个社會。

⁵ 暗摸叮咚：音 am mo ˊ din ˊ dung ˊ；天色或環境暗得看不見的樣子，形容一片漆黑。

⁶ 擎火：音 kia ˇ fo ˋ；拿著手電筒。

⁷ 電珠仔：音 tien zu ˊ e ˋ；燈泡。

⁸ 弄出來：音 nung cud ˋ loi ˇ；鑽出來。

⁹ 驚驚險險：音 giang ˊ giang ˊ hiam ˋ hiam ˋ；感到驚險可怕的样子。

¹⁰ 哪當得：音 nai dong ded ˋ；怎麼比得過。

¹¹ 爭差：音 zang ˊ ca ˊ；差別。

編號 2 號

【學泅水】徐姿華原作

佢一旦就當驚水，小學一年生該下，先生鼓勵大家學泅水，講泅水係當好個運動，身邊個好同學做下學會泅水哩，硬性個佢乜毋願輸人，轉去屋下就緊嚟¹阿媽講愛去學泅水。趕等暑假，阿媽同佢尋著一間溫水個游泳池，還問著名聲盡好個教練來教佢，過買一身靚靚個連身游泳衫分佢，鼓勵佢勇敢學泅水。

第一到去到游泳池，又驚又好。做好軟身運動，教練帶佢同另外四個學生仔練習沒水、學換氣，同佢兜一個一個拗入游泳池。佢兜乖乖聽教練個指示，同頭那沉²入水裡肚，佢嚇到胚命仔扳等游泳池脣、腳踭仔毋敢沾著水、抽骸另命、噉到目流凜串，像分人苦毒到當衰過樣仔；脣項個人做下緊看佢緊笑，教練緊拐佢，佢還係噉到抽骸、毋肯落水，高不將正喊阿媽同佢帶轉去。

該暗晡，阿爸軟聲勸話佢繼續去學泅水；阿媽就唉唉唧唧道嘆：「你毋去上課，學費就了忒哩，無好退！」阿哥也分享自家學泅水個經驗，還拿出佢盡愛惜個極樂仔講愛做佢學會泅水個獎品。在大家個鼓勵之下，佢答應第二日愛過去上游泳課。

第二日朝晨，阿媽愛載佢去上游泳課，催了催佢還係啊啊奶奶

¹ 嚟：音 kieuˋ；小孩子對大人有所要求的聲音或動作。

² 沉：音 ciim；因外力所致而被推入、沒入水中。

³、這摸該摸毋肯停動。上課時間硬硬會赴毋著咧，阿媽發譴擎雞毛掃仔⁴愛修理佢，佢試著當委屈，又驚分阿媽打又驚去泅水，就噉到大嫲聲，歸條巷仔都聽到清清楚楚。鄰舍過來關心，知著佢係驚泅水正噉到恁大聲，做下忍等笑來鼓勵佢。就恁仔，該站時間，朝晨頭巷頭巷尾若係聽著佢又噉到噉噉滾⁵，就知該日佢又愛去上游泳課咧。

經過三禮拜個訓練，游泳課個同學一儕儕都學會泅也，同學一陣換了一陣，佢還係手同腳配合毋著，手記得划咧腳又毋記得踢，實在毋得結煞。有一日，佢自家在該練習，毋多知仔手同腳嘎配合得著哩，泅有五公尺恁遠，心肝肚實在還歡喜哪！佢續等過練，緊練緊知得該要領，手腳較省力哩，圓身也緊來緊輕鬆，佢正第一擺感受著泅水個趣味。

感謝該當時，屋下人個鼓勵，分驚水個佢面對自家個困難去學泅水，分佢有機會去克服自家較軟弱個所在，這下個佢，毋單淨曉得泅水哩，也有信心去面對人生個各種挑戰。

³ 啊啊奶奶：音 aˊ aˊ naiˊ naiˊ；懶懶散散、愛理不理的樣子。

⁴ 雞毛掃仔：音 gieˊ moˊ so eˋ；雞毛撻子。

⁵ 噉噉滾：音 ve ve gunˋ；不斷的大叫或大哭。

編號 3 號

【拈田螺】郭亭好原作

當久毋識轉莊下，記得莊下个風特別涼、天特別青。熱天偌同老妹長間分烈烈个日頭逐去大樹下園，坐在阿爸用粗麻索繃樹枋做个晃槓仔面頂，一儕擎一支涼沁沁仔个枝仔冰，冰緊舐、晃槓仔緊搖，涼凉个風吹等來，樹頂還有歸陣仔蟬仔¹在該「搵搵衣、搵搵衣」唱歌仔分偌兜聽。成半下在屋簷角，白頭烏佢兜也會來鬥鬧熱；毋驚人个膨尾鼠，乜在樹頂頂舂上舂下、跳來跳去。

言讀書个偌同老妹歸日仔同阿公、阿婆共下寮，有一日阿公愛去巡田水，問講想愛跣佢去拈田螺無？好搞个偌跣等就應好，老妹也講愛跣。阿公蹶上半棚个閒間仔，搨出兩雙細水靴仔來分偌兜換，過拿兩頂鹹草帽分偌兜戴，佢自家也戴一頂大笠嫲。

阿公擎等鑊頭行頭前，偌同老妹一儕攞一隻細錫桶仔跣背尾，偌兜歸路仔啦歌哩曲當歡喜，阿公笑咪咪仔阿謔偌兜唱來當好聽，偌兜也風神到緊唱緊大聲。行到伯公下，脣項該搭平洋洋仔个禾頭田，就係阿公耕个田，阿公指等圳溝肚講：「你兜看，這位就有田螺好拈咧，跣等這細圳溝仔改一路下，有當多田螺好拈哦！」阿公

言講煞，老妹就好擲擲仔²先跳落圳溝肚開始拈也！

偌同老妹相拈仔看麼人拈較多，兩儕頭磬磬仔煞力拈緊拈，都驚分人逐過去，麼人也毋肯輸人。一下無堵好，老妹个水靴仔嘎潔在濫泥裡肚，水靴仔裡肚分濫泥塞滄也，老妹想愛掛泥同鞋擱起來，嘎仰仔都擱毋起來，還緊潔緊深，佢大聲喊偌過去同佢搵手，偌攞等厥大腳髀兩儕共下出力，結果鞋無擱起來，兩儕嘎跌到四腳惹天，搵到歸身仔溶潦合泥棍棍仔，連面也舞到像烏貓公个樣仔。阿公看著，遽遽行兼來同偌兜拉跣起來，過用手定定仔同老妹个水靴仔摟起來。阿公講：「你這兩個孤盲頭³，等下轉去，會害偌分若婆罵咧！」

驚分阿婆罵，轉到屋下偌兩儕偷偷囡囡趨入屋肚去，阿婆影著兩隻烏貓公轉來咧，好譴又好笑，喊偌兜遽遽去洗身，同一身烏疏疏仔个衫褲換下來。該載好性个阿婆無譴，毋過，還記得該日偌兜洗身洗當久，硬硬就會鑪忒一層皮咧，歸身仔都還略略仔臭泥轟，這下偌見看著田螺就會恹起這兜生趣个事情。

¹ 蟬仔：音 sam ˇ e ；蟬。

² 好擲擲仔：音 hau jied jied e ；興趣盎然的樣子。

³ 孤盲頭：音 go ˊ mo ˊ teu ˇ ；在此為「好傢伙」的意思。